

منولوج : لي خلق ما يضيع.

تأليف: نادية كرومي.

شوفو يا خوتي أنا سموني عيسى ما عمره بابا لا دلعني، توجور يعيطلي ب

l'accent

تاع الشاف و

patron

تجور يقول لي: عيسى رواح لهننا، اليوم راح تحرث الأرض، وترعي الغنم، أنا
الحاج محمد راه عيطلي باش نحضر لفرح بنتو فايضة، اقعد ورايا واخدم بلاما
جيت ، وقول ليماك تدير ليهم قصعة تاع طعام باش نديها ليهم، ياخي راه
جارنا وبتتو راها كي بنتنا، ربي يهنيها ويرزقها بالذرية الصالحة.
كنا عاشين لابس علينا الحمد لله في ذيك الفارم، بعاد على المدينة، مكان لي
يجيننا ولا يديرونجينا، إيه يا دنيا كانت البركة، وكان الخير مضاعف، وكانت
اللمة..

ودوك ولات ديار فارغة وغير تدخل ليها تحكك الغمة.

كان بابا يعلمني من لي كنت صغير بلى العمل عبادة، لازم نخدم ونجيب قوتي
من عرق جبيني .

كان لازم نخدم ذاك الوقت باش نجيب قوتي، الفقر مشي عيب،
بصح المعاملة تاع ناس لي هي لي جيناتني كيفاش يشوفو للباس
ويخلو العقل؟ هذه لي ما فهمتهاش، كنت نلبس على حسابي
ما كنت نلبس الغالي ولا ندير تسريحات عصرية لشعري

، كنت معجب بحالي هكداك،

هذا هو الرجل تاع القرية، حشام، يفوت علي بيوت الناس، متحمل كامل
مسؤولية حاجة ما تجيينه، ربي شايفه وعالم به
وراضي عليه..

إيه زمان كانت دنيا نية، بصح كي بغيت نخطب ولله غير سوفريت
لي نخطبها تقولي يا عيسى أنا خصني واحد يكون أرتيست
شبوب وعقلية، كي نشوفه قدامي يعمر لي العين
واش ندير أنا إذا مشي شباب..

أنا نعرف بلي الرجل لي قابض حرمتو ويخدم وجيبو حامي
هو الرجل لي يقدر يتزوج، بصح دوك كي رحت نخطب خدمتلي في الراس،
دوك على كبري نروح ندير تجميل باش يقبلو بيا..
إيه درت على الناس ورحت ندير عملية تجميل قلت بالك نولي شباب ويقبلو
بيا، في النهاية راح نضحى باش نتزوج ، وندير دار وليدات كما الناس،
يا خوتي وقررت نروح لعند الطبيب باش ندير تجميل بالابر ، انا دخلت يا يما
دا الناس لي جاية ليه الطايح أكثر من النايض، ولي خلعتني لبنات أكثر من
الرجال دي حابة تنفخ ودي حابة تنقص أنا ما فهمت والو، شعب كامل حاب
يبدل روجو باه يتزوج ولا غير أنا؟

بقيت حاير كيفاه ندير، ومن بعد خزرت شوية لقيت وحدة عجوز مقابلتني تا
هية دايرة لشان عند الطبيب قتلها واش جابك هنا قاتلي يا وليدي

أنا بغيت نولي صغيرة، قتلها واش حابة تديري قاتلي حابة ندير بروتوكس
جاري جا من فرنسا وراه باغي يتزوجني، قتلها أنت مشي متزوجة قاتلي لا
أنا عزباء..

بقيت ندور في راسي ديك الهدرة؛ إيه مشي غير أنا ني محتار تسما كامل
ناس راهم حابين يبدلو، تم عرفت بلي العفسة راها في الثقة يا خوتي مشي
فيا و داك نهار وليت نوثق في نفسي، قلت ذا المرة نروح ونجرب وغير
دخلت لقيت هذيك البنت لي خطبتها تبكي قتلها واش بك
قاتلي أنا خطبني واحد وراك يقتل بالشبوب بصح المشكل بلي ما يحبنيش
ويحب غير يفوت وقتو معايا، والزواج عنده سبة باش يحكي معايا، بصح أنت
حبيتي وبغيتني في الحلال، وقبلت بي..
إيوا خوتي لي خلق ما يضيع.

